

之慟。其遂編茅言於諸公之右者，非不知讓，聊以仿古人序經之意云爾。

高陽門下晚學生王作舟拭淚謹述

輓詩

韓蓋光等

隔岸呼仙人，仙人不肯住。拾得衣帶香，種作薰蘭樹。剪作我衣裳，佩之無朝暮。朝暮時佩之，如與仙人遇。乃知有遺馨，不必披雲晤。一室有奧人，千里有情素。曠古有知音，同時有歧路。如有所重輕，不在新與故。予生也固晚，泫然涕晞露。

晚生韓蓋光頓首書

昔避燕山遠，今歸向北邙。旌旛述壟樹，簫鼓咽邱霜。塞近邊雲黑，塵昏夜日黃。淒淒泉下路，何以慰荒涼。

晚生齊國琳頓首書

群生疇免此，不朽惋吾君。言笑虛空問，簡書篋簞珍。詞貞堪毒鬼，理至亦全神。可惜一杯土，竟埋千古人。

晚生孫之藻頓首書